

**Deus puniens personam conjunctam pro
persona peccante, jure suo utitur.**

Impia vaniloquum quæ spargunt murmura vulgus?
Nos luimus poenas, quas meruere patres.
Quis Domini virgas reprimet? quis fulminis ictum?
Argillæ in plastrum nulla querela pia.
Sedibus æthereis quicquid Natura recluserit,
Telluris quicquid viscera cæca tegunt,
Omnia Divino manarunt fonte perenni:
Quique dedit gratis, tollere jure potest.
Aspice compagem mundi: Si dicere possis,
Dixi, atque hoc factum est, sumito jure tibi.
* Quid meruere tui, clamas, sanctissime David: * 2. Sam. 24. 17.
Ut vitam acciperent, quid meruere? rogo.
Est extenta manus; * nati sed tempore cædet: * 1. Reg. 21. 29.
Quis melius novit temporis articulos?
Si caput humorum cruciat terrena grædo,
Ut sanet Medicus, cætera membra secatur.
Deficiat serpens imâ radice medulla;
Audacter ramos amputat Agricola.
Quis culpat Medicum? cultor cui displicet agri?
Num membra aut rami murmura jure movent?
Incipiant reges tumido turgescere fastu;
Dira in subjectos spicula sæpe cadunt.
Commaculent sceleris fœdâ se labe parentes;
E medio natos mors violenta rapit.
In jus quis Dominum? Si quis componere gestit,
Plus hinc imperii, plus videt inde mali.

Et nostra & patrum peccata, Æquissime, dele:
Hinc, illinc justè quisque perire potest.

**Bona opera habent gratiosam mercedis
promissionem.**

Quæ mala vertigo! fugentes ubera Matris
Distrahit in partes hinc *Nimis*, inde *Nihil*.
Hinc Operum splendor nimis audit splendidus: illinc
Vendicat (heu! audax) omnia nuda Fides.
Ille manu abscissâ cœlestia pandere jactat
Ostia: posterior curreret absque pede.
Discite, stultiloqui, concordēs jungere dextras;
Cum bene jungantur Gratia, Facta, Fides.
Gratia præveniat; splendentia Gesta sequantur:
Pulchra placet mater; filia pulchra placet.
Sculpta Dei primum verbo *FACIAMUS* imago:
Haud alio amissam quis reparare potest.
Dum bona molimur, primum spiramus honorem:
Et clamat Numen sanctius, *Ecce bonum!*
Clamat, & his tantum largitur præmia digna:
Dantis enim larga est, est oculata manus.
Non qui securæ se solvit in otia vitæ,
Expectet Patris luxuriare sinu.
Vulnera, sudores, lacrymæ, suspiria signant
Fronte pios: Tales læta corona manet.
Ultima cum venient horroris tempora plena,
Cumque liber Vitæ clausus, apertus erit;
Quid fecit, miseros mortales dividet inter:
Et *Male* dat tenebris; dat *Bene* luce frui.
At procul hinc absit meritorum assertor inanis:
Justorum merces gratia sola Dei.
Promisit Dominus noster, tutissima sancti
Anchora: quâ demptâ, fluctuat ipsa Fides.
Est firmum Domini pactum; confidite, sancti:
Gratuitum est; spes hinc læta, modesta decet.

Indignus, Dignus, lites non amplius addant:
Diffusa naturâ hæc; Gratia juncta leget.
Cum Deus indignum tali dignetur honore,
Dignus ero Domino, non mihi dignus ero.



Resp.
M^r Wrigmore Reginald.

Oppon.
D^r Bray Coll: Xti.
D^r Young Coll: Johis.
D^r Walton Coll: Petr.
D^r Fish Coll: Xti

Moder. et Perterm.
D^r Ward. Coll. Syd. sup. Profs. D^a Margareta.

Tempore pomeridiano M^r Dalton Coll: Trinit.